

古今譚槩

叙譚槩

古亭社弟梅之煩惠連述

猶龍譚槩成梅子讀未終卷歎曰士
君子得志則見諸行事不得志則托
諸空言老氏云譚言微中可以解紛
然則譚何容易不有學也不足譚不

有識也不能譚不有膽也不敢譚不
有牢騷鬱積於中而無路發摠也亦
不欲譚夫羅古今於掌上寄春秋於
舌端美可以代輿人之誦而刺亦不
違鄉校之公此誠士君子不得志於
時者之快事也猶龍曰不然子不見

夫鸛鵒乎學語不成亦足自娛吾無
學無識且膽銷而志冷矣世何可深
譚譚其一二無害者是謂槩梅子曰
有是哉吾將以子之譚槩子之所未
譚猶龍曰若是是旌余罪也梅子笑
曰何傷乎君子不以言舉人聖朝寧

以言罪人知我罪我吾直爲子任之
於是乎此書遂行於世

古今譚槩

古吳馮夢龍纂

古亭梅之煩閱

迂腐部

怪誕部

癡絕部

專愚部

謬誤部

無術部

苦海部

不韻部

癖嗜部

越情部

佻達部

矜持部

貧儉部

汰侈部

貪穢部

驚忍部

容悅部

顏甲部

閨誠部

委蛇部

誦知部

僂弄部

機警部

酬嘲部

塞語部

雅浪部

文戲部

巧言部

談資部

微詞部

口碑部

靈蹟部

荒唐部

妖異部

非族部

雜志部

迂腐部第一目錄

問牛

驅驢宰相

彈髮御史

鸞鴨諫議

成弘嘉三朝建言

宋羅江

羅擒虎張尋龍

引月令

諫折柳

賢良相面

京兆京尹禱雨

請禪天下

卦宜誤樂

哭天

孝經可退賊息訟却病

計二條

脩身爲本

迂腐有種

計二條

治平之學

舒太守笑

許子伯哭

孝泌

郭達將畧

反支日忌日

計二條

檢譜角觝

奇技自獻

李晟張一中談兵

獻策官銜

劉王辱罵

罰人食肉

河南令

歸王吏治

豫史養名

不禁盜墳

昌州佳郡

忌諱

計三條

龍驤多諱

諱父名

計八條

諱已名

計二條

求七十二世祖墳

束帶耕田

束帶應兄語

王劉莊臥

讀父書

敬妻

計二條

妻犯齋禁

百忌曆

拱手對妾

問安求嗣

不近妓

計三條

心中有妓

欲黥妓面

李退夫穢語

雅言 計二條

誦經稱小人

匍匐圖

滅竈

懷繡

飲食必以錢

別駕拾桑

却衣

埋羹

珠玉報

仇管省過

顧協

吳徵士學問 計二條

太極寃

心學二圖

萬物一體

茶具

紫胡桃

迂腐部

子猶曰天下事被豪爽人決裂者尚少被迂腐人擔
誤者最多何也豪爽人縱有疎畧譬諸鉛刀雖鈍尚
賴一割迂腐則塵飯土羹而已而彼且自以爲有學
有守有識有體背之者爲邪斥之者爲謗養成一箇
怯病天下以至於不可復而猶不悟哀哉雖然兩相
溫公自是大賢特摘其一事之迂耳至如梁伯鸞程
伊川所爲未免已甚吾并及之正欲後學大開眼孔
好做事業非敢爲邪爲謗也集迂腐第一

○○問牛

丙吉爲丞相嘗出逢鬪者死傷橫道吉過之不問已而逢人逐牛牛喘吐舌吉止駐使騎吏問逐牛行幾里矣掾吏謂丞相前後失問吉曰民鬪相殺傷長安令京兆尹職所當禁備逐捕歲竟丞相課其殿最奏行賞罰而已宰相不親小事非所當於道路間也方春少陽用事未可太熱恐牛近行用暑故喘此時氣失節恐有傷害三公典調陰陽職所當憂是以問之

死傷橫道反不干陰陽之和而專計畜生口氣迂腐

莫甚於此。友人詰余曰：誠如子言，漢人何以吉爲？知大體，余應曰：牛體不大於人耶？友人大笑。

○驅驢宰相

王及善，才行庸鄙，爲內史，時謂鳩集鳳池，俄遷右相，無他施設，惟不許令史輩將驢入臺，終日驅逐，時號驢驢宰相。

驅驢出堂，正存相體。

○彈髮御史

宋御史臺儀，凡御史上事，一百日不言，罷爲外官，有王

平拜命垂滿百日而未言事同僚訝之或曰王端公有待而發必大事也一日間進劄子衆共偵之乃彈御膳中有髮其彈詞曰是何穆若之容忽覩髮如之狀王躬是保忠孰大焉是學丙吉樣子

○驚鴨諫議

高宗朝黃門建言近來禁屠止禁豬羊聖德好生宜并禁驚鴨適報金虜南侵賊中有龍虎大王者甚勇胡侍郎云不足慮此有驚鴨諫議足以當之

我朝亦有號蝦蟆給事者大類此

○成弘嘉三朝建言

成化間一御史建言順適物情云近京地方行役車輛騾驢相雜騾性快力強驢性緩力小今竝一處驅馳物情不便乞要分別改正弘治初一給事建言處置軍國事云京中士人好着馬尾襯裙因此官馬被人偷拔鬃尾有誤軍國大計乞要禁革嘉靖初一員外建言崇節儉以變風俗專論各處茶食舖店所造看卓糖餅大者省功而費料小者料小而費功乞要擘畫定式功料之間務在減省使風俗歸厚

極小文章生扭在極大題目上肉食者鄙信然

○宋羅江

慶曆中衛士震驚宮掖尋捕殺之時臺官宋禧上言此
失守於防閑故耳聞蜀羅江狗赤而尾小者其微如神
須詔索此狗繫於掖庭以備倉卒時號爲宋羅江
凡亂吠不止者皆羅江也何必曰無若宋人然

○羅擒虎張尋龍

嘉靖中察院羅相上言越州多虎乞行下措置多方捕
殺正言張次賢上言人盤嶺乃禁中來龍乞禁行人太

學諸生遂有羅擒虎張尋龍之對

○○引月令

甘延壽陳湯旣斬郅支單于首請懸頭菜街蠻夷邸間以示萬里明犯強漢者雖遠必誅丞相匡衡議月令春掩骼埋胔之時宜勿懸

還問他斬郅支首是何時恐不合秋後行刑之律

○○諫折柳

程頤爲講官一日講罷未退上偶起凭檻戲折柳枝頤進曰方春發生不可無故摧折上擲枝於地不樂而罷

遇了孟夫子，好貨好色都自不妨。遇了程夫子，柳條也動一些不得。苦哉苦哉。

○賢良相面

唐肅宗時，初詔賢良，一徵君首應上，極喜，召對，無他詞，但再三瞻望上顏。遽奏曰：「微臣有所見，陛下知不？」上曰：「不知。」對曰：「臣見聖顏瘦於在靈武時。」上曰：「宵旰所致耳。」舉朝大笑。帝亦知其爲妄人。又，字、無、昭、王恐塞賢路，乃除授一令舉朝官員，還有不管皇帝肥瘦的，此賢良較勝，只怕作令後，反不管百姓肥瘦耳。

○京兆京尹禱雨

唐代宗朝、京兆尹黎幹以久旱祈雨、於朱雀門街造土龍一具、悉召城中巫覡、以身雜入、共舞於龍所、觀者嗤笑、彌月不雨、又請禱於文宣王廟、上聞之、戲曰、丘之禱久矣。

○請禪天下

孝昭時、泰山萊蕪山南、洶洶有數千聲、民視之、有大石自立、高丈五尺、又上林苑中大柳樹斷枯臥地、亦自立、生、畦孟推春秋之意、以爲石立柳生、當有從匹夫爲天

子者卽說曰董仲舒有言雖有繼體守文之君不害聖人之受命漢家堯後有傳國之運漢帝宜誰差天下問差求索賢人禪以帝位而退自封百里如殷周二王後以承順天命使友內官長賜上此書霍光惡其妖言惑衆誅之

此等建言非漢人不敢然迂亦甚矣

○○卦宜娛樂

宋侍讀林瑀自謂洞於周易嘗以仁宗時合易之需需之象曰君子以飲食宴樂須頻宴遊務娛樂始合卦體

而天下治。仁宗駭其說，斥之。

飲食宴樂，人主自會，不須相勸。

○○哭天

漢兵盛，莽憂甚，不知所出。崔發言：周禮及春秋，國有大災，則哭以厭之。故易稱先號咷而後笑。宜哭天求救。莽乃率羣臣至南郊，陳其符命本末，因搏心大哭，氣盡伏而叩頭。又作告天策千餘言，諸生小民，令旦夕哭，爲設餐粥。凡能誦策文者，除以爲郎，至五千餘人。漢兵入都門，官中火，莽避火，宣室前殿，火輒隨之。官人號呼，時莽

紺袍服帶璽報持廣帝七首天文郎接拭於前時日加
某葬旋席隨斗柄而坐曰天生德于予漢兵其如予何
○孝經可退賊息訟却病

張角作亂向栩上便宜不須興兵但遣將於河上北向
讀孝經賊自消滅

趙韓王以半部論語定天下孝經何不可破賊

國初有孝子王漸作孝經義五十卷事亦該備而漸性
鄙朴凡鄉里有鬪訟漸卽詣門高聲誦義一卷後有病
者亦請漸誦書

○○修身爲本

藩司吳夢蜚家有怪時出以竊飲食間竊衣飾金銀吳
厭苦之偶訴監司徐公徐曰邪不勝正朱書修身爲本
四。大。字。今。帖。堂。中。鬼。見。拍。手。擲。榆。且。出。穢。語。徐。大。作
○○迂腐有種

唐昭宗時鄭榮爲相太原兵至渭北天子謁於懷却之
術榮奏對請於文宣王謚號中加一哲字後榮孫珽相
梁末帝唐莊宗兵入汴帝惶恐不知所爲珽獻一策願
得陛下傳國寶馳入唐軍以緩其行而待救兵之至帝

曰、實不足惜、顧卿之行、能了事否、珏俛首徐思曰、但恐不易耳、

是祖是孫、

開元間、上東封泰山、歷城令杜豐辦供應、以爲從幸人多、設有不虞、倉卒不備、乃造凶器三十具、寘諸行宮、光彩赫然、有刺史駭謂主上封嶽祈福、誰造此不祥、將索治、豐豐逃、臥妻牀下、詐死得免、時豐子杜鍾爲兗州參軍、掌廐馬、藹豆曰、御馬至多、臨日、煮之不給、不若先辦、乃煮粟豆二千餘石、熱納窖中、及至、皆臭敗矣、

是父是子。

○治平之學

元胡石塘應聘入京。世祖召見。不覺戴笠傾側。及問所學。對曰。治國平天下之學。上笑曰。自家一笠尚不端正。又能平天下耶。竟不用。

陳蕃不掃一室。爲欲掃清天下。石塘不正笠。意者志不在一笠也。惜哉。不以此對。袁忠公曰。爾時方溫大。學想不到此。

○舒太守笑

舒玉性耽經史對客語未嘗有笑容知常州日值

大會娼優在庭公忽大笑僚佐呼優犒之曰汝能使太
守開顏真可賞也一人竊疑公笑不由此乘間問公公
曰疇日席上偶思咸常二卦豁悟微旨自喜有得故不
覺發笑耳

對賓客宜思同人卦對酒食宜思需卦可惜一笑殊
不切景

○許子伯哭

許子伯與友人言次因及漢無統嗣幸臣專朝世俗衰

薄賢者放退。慨然據地悲哭。時稱許伯哭世。

卓老曰。人以爲澹。我以爲趣。子猶曰。杞人恐天墜。漆室愁魯亡。若遇許子伯。淚眼成湘江。

○孝泌

江泌字士深。有孝行。族有與泌同名者。世謂爲孝泌。以別之。然菜不食心。謂其有生意。衣敝多虱。以綿置壁前。恐虱饑死。復置衣中。

五穀都有生意。何以獨食。爲一虱大費周折。又可笑。

○○郭達將畧

郭逵伐交州行師無紀律其所措置殆可笑也進兵有
日矣乃付諸將文字各一大軸謂之將軍下令字畫甚
細節目甚繁又戒諸將不得漏洩諸將近燈火竊觀之
徐禧嘗見之云如一部尚書多禧三日夜讀之方竟則
諸將倉卒之際何暇一一也內一事云一交人好乘象
象畏猪聲仰諸軍多養猪如象至則以錐刺猪猪既作
聲象自退走

○○反支日 忌日

王莽敗張竦客池陽知有賊當去會反支日不去因爲

賊所殺。

反支果是凶日。在家且得禍。何況出行。

涇州書記薛昌緒。天性迂僻。梁師入境。涇帥宵遁。臨行。攀鞍忽記曰。傳語書記。速請上馬。連促之。薛自匿草菴下。出聲曰。傳語太師。但請先行。今日辰是某不樂。涇帥怒。使人提上鞍轡。捶其馬而逐之。尚以物蒙其面。云忌日。禮不見客。

好箇薛迂僻。忌日草菴匿。不見客。寧見賊。

○檢譜角紙

江陵顧雲偶於市上收得孔明兵書遂負可將十萬吞并四海每至論兵必攘袂叱咤若真對大敵時謂之檢譜角觝。

雜俎載賭錢呪云伊諦彌諦彌揭羅諦念滿萬遍呼骰色隨意而轉有趙生者信之誦至千喜曰亦足小勝遂與人決賭連呼不驗喪貲而返顧雲何以異此。

○奇技自獻

新莽時博募奇技可以攻匈奴者將待以不次之位言便宜者以萬數或言能渡水不用舟楫連馬接騎濟百

萬師或言不持斗糧服藥物三軍不饑或言能飛一日千里可窺匈奴莽試之取大鳥翮爲兩翼頭與身皆着毛通引環紐飛數百步墮莽猶欲獲其名皆拜理軍

○李晟張一中談兵

成化二年都察院經歷李晟言邊務兵機各五事以薦用舊臣非所宜言降調爲通判弘治元年復上疏言臣學兵法四十年得其奇要上戰法一篇急務二篇高自稱許上命工部試造戰車弓弩俱不可用坐虛廢錢糧降四級爲雲南曲靖衛知事十年復上疏言邊事稍

遷都察院照磨十五年遷鄖陽府撫民同知不肯行明年復上疏願邊方自效得旨候有西北邊兵備員缺推補正德四年冒候缺兵備僉事上書獻安攘六論下兵部參其大言無實垂老不悟姑免罪放回閒住八年再冒銜上兵書五種仍放回四、次、史稱其所制全身鐵甲工部鑄而俾試之行數步輒仆焉

王弇州云晟旣姓李而名同西平其小時雅自負矣據其弘治元年疏學兵法已四十年當亦不下五十至正德八年且八十餘而氣不少沮亦人妖哉

張進士一中初名寬湖廣襄陽人流賊犯襄陽寬以翰林檢討自乞贊軍務建策驅流人還鄉累死者以千萬計尋陞按察僉事坐貪淫革職至是北虜犯塞潛來京師上疏請易旗號盛甲皆爲黃色牌面皆作虎形曰黃爲中央之土以剋北方之水虎驚胡馬之目見必懼退然後以神鎗藥箭射之且自謂秘機不敢詳於副封奏疏乞畱中不出下兵部參其庸妄干進罷之

○○獻策官銜

高郵學正夏有文弘治末獻書闕下曰萬世保豐永亨

管見。上嘉之。更管見二字曰策。夏遂書官銜云。獻萬世保豐永亨。管見天子改爲策字。高郵州學正夏有文。

○○劉王辱罵

劉寬常坐客。遣蒼頭市酒。去久。大醉而還。客不堪之。罵曰。畜產。寬須臾遣人視奴。無忿否。顧左右曰。此人被罵畜產。辱莫甚焉。吾懼其自殺耳。

王昕在東萊。獲殺其同行侶者。詰之。未服。昕從容謂曰。彼物故不歸。卿無急而返。何以自明。邢邵見文襄。北齊高澄說此以爲笑樂。昕聞之。詣邵曰。卿不識造化。還謂人曰。

子才應死，我罵之極深。

○○罰人食肉

李載仁，唐之後也。避亂江陵，高季興署觀察推官。性迂緩，不食豬肉。一日將赴召，方上馬，部曲相段載仁怒，命急於廚中取餅及豬肉，令相段者對餐之。復戒曰：如敢再犯，必於豬肉中加之以酥。

○○河南令

宋子京畱守西都，有同年爲河南令，好述利便，以農家藝麥費耕耨，改用長錐刺地下種，自旦至暮，不能一畝。

又值蝗災，科民畜雞，云：「不惟去蝗之害，兼得畜雞之利。」
剋期令民悉呈所畜，羣雞既集，紛然格鬪，勢不能止，逐
之飛走，塵埃障天，百姓喧闐不已，相傳爲笑。

據孟子，則畜雞極是王政，但恨不得雞坊小兒作都
司晨耳。

○歸王吏治

歸太僕有光，謫官吳興，每治事，胥吏輩環擠案旁，幾不
容坐，歸以硃筆飽蘸，捉向諸人曰：「諸君若不速退，我便
灑將來也。」合堂大笑。

吾蘇王中吳先生，厚德而拙於吏治。由鄉科爲縣令，每視事有疑，輒密緘條紙質之記室。一日拆封，見吏匿銀怪之，亟爲傳問，得教云：「此弊也，宜重懲。」王爲點頭。久之拆完，王問吏何以匿銀，吏堅諱，搜之不得，怒責十板，既退，餘怒未息，述諸記室。記室曰：「何不監追贓物而輕釋？」乃爾。王搖首曰：「使不得責至七八板時，彼羞極，面俱發赤矣。」

○ 椽史養名

漢朱博遷瑯琊太守，齊部舒緩養名，博新視事，右曹椽

史皆移病臥。博問其故。對言惶恐。故事二千石新到。輒遣吏存問致意。乃敢起就職。博奮髯抵几曰。齊兒欲以此爲俗耶。皆斥罷之。白巾走出府門。郡中大驚。

○不禁盜墳

一朝士賦性甚迂。知河中府龍門縣。有薛少卿者。寄籍於縣。墳塋松楸。忽經盜砍。因詣縣投牒陳訴。朝士判曰。周文王之苑囿。尚得芻蕘。薛少卿之墳塋。乃禁樵採。

○○昌州佳郡

李丹授昌州倅。以去家遠。乃改鄂州。彭淵材聞之。吐飯。

大步往謁李曰、誰爲大夫謀、昌佳郡也、李驚曰、何以知其佳、淵材曰、海棠無香、昌州海棠獨香、非佳郡乎、

淵材嘗言平生就死無恨、惟有五事不甘耳、人問其故、淵材曰、第一恨鱗魚多骨、第二恨金橘太酸、第三恨蓴菜性冷、第四恨海棠無香、第五恨曾子固不能詩、聞者大笑、

○忌諱

宋文帝好忌諱、文書上有凶敗喪亡等字、悉避之、改駟馬字爲馬邊瓜、以駟字似禍故也、移牀修壁、使文士撰

祝、設太牢祭土神江謚言及白門上變色曰白汝家門、
後梁蕭譽惡人髮白漢汝南陳伯敬終身不言死、

民間俗諺各處有之而吳中爲甚如舟行諺住諺翻
以筋爲快兒、幡布爲抹布、諺離散以梨爲圓果、傘爲
鑒笠、諺狼籍以郎搥爲興哥、諺惱躁以謝寃爲謝歡
喜、此皆俚俗可笑處、今士大夫亦有犯俗稱快兒者、
謝在杭云、余所見縉紳中有惡鴟鳴者、日課吏卒左右
殺、弓挾彈、如防敵然、值大雪卽不出、惡其白也、官文書
一切史字丁字孝字老字皆禁不得用、

湖友華濟之常言其郡守某忌諱特甚初下車丁長
孺來謁賀怒其姓拒之再三涓人解其意改丁爲干
乃欣然出見一日御史臺有大獄當讞牘中有病故
字吏以指掩之守見文義不續以筆擊去吏指忽覩
此字勃然色變急取文書於案卓足下旋轉數次口
誦乾元亨利貞合堂匿笑

柳冕爲秀才性多忌諱應舉時有語落字者忿然見於
詞色僕夫犯之輒加箠楚常謂安樂爲安康聞榜出遣
僕視之須臾僕還冕迎門曰得否僕由秀才康了

○龍驤多諱

厭勝章言梟乃天毒所產鬼聞者必罹殃禍急向梟連吐十三口然後靜坐存北斗一時許可禳焉漢蒙州刺史龍驤武人極諱已名又父名喈子名邛亦諱之故郡人呼梟曰吐十三鵲曰喜奈何蚤曰秋風部屬私相告云使君祖諱飯亦當稱飯粥耶

○諱父名

則天父名獲改華州爲秦州章憲太后父名通改通州爲同州朱溫父名誠以其傍類戊改戊巳爲武巳楊行

密父名怵與夫同音凡御史大夫光祿大夫皆去夫字御史大光祿大是何官銜何不曰大御史大光祿唐李賀以父名晉終身不舉進士

韓昌黎曰父名晉不舉進士若父名仁子遂不得爲人乎陳錫玄曰此諱而近愚者也杜衍帥并州吏諱家諱公曰我無諱諱取枉法賊耳斯則達人大觀袁德師給事中高之子九日出糕啖客袁獨凄然不食北齊劉臻性好啖蜆以音同父諱呼爲扁螺范曄以父名泰不拜太子詹事

呂希純以父名公著辭著作郎

劉溫叟父名岳終身不聽樂不遊嵩華

徐積父名石平生不用石器不踐石遇石橋使人負之而趨

王逸少父諱正每書正月爲初月或一月而其名諱子曰徽之獻之操之其孫又名直之三世同用之字此更不可解

○諱已名

田登作郡怒人觸其名犯者必苦舉州皆謂燈爲火值

上元放燈，吏揭榜於市曰：「本州依例放火三日。」俗語云：「只許州官放火，不許百姓點燈。」本此。

宋宗室有名宗漢者，惡人犯其名，謂漢子曰：「兵士舉官皆然，其妻供羅漢。」其子授漢書，官中人曰：「今日夫人召僧供十八大阿羅兵士。」太保請官教點兵士書。

石虎時，號虎爲王猛，朱全忠時，號鍾爲大聖，銅又李甘家，號柑子爲金輪藏，楊虞卿家，號魚爲水花，羊陸先家，號牛爲鈍公子，李栖筠家，號犀爲獨筍牛，俱以避諱故也。至如天成長興，中稱牛曰格耳，則以屠牛

禁嚴特隱其名而僧家謂酒爲般若湯魚爲水梭龍雞爲鑽籬菜巧言文過尤可惡矣

求七十二世祖墳

熊安生在山東時或誑之曰某村故塚是晉河南將軍熊光去今七十二世舊有碑爲村人埋匿安生掘地求之不得連年訟焉冀州長史鄭大謹判曰七十二世乃義皇上人河南將軍晉無此號安生率其族向塚而號

束帶耕田

原平墓下有數十畝田不屬原平每農月耕者袒裸原

平不欲使慢其墳墓乃歸賣家貲買此田三農之月輒束帶垂泣躬自耕墾。

古者諸侯籍田冕而登紘躬秉耒以耕亦如此光景○東帶應兄語

劉祭酒弟璉方軌正直祭酒常夜呼璉欲與共語璉不時答下牀著衣立然後應祭酒怪其久璉曰向東帶未竟。

○玉劉莊臥

王文公凝靖修重德冠當世每就寢息必叉手而臥以

夢寐中恐見先靈也。

見先靈更須衣冠束帶俯首鞠躬何但又手。

五代劉詞常被甲枕戈而臥謂人曰吾以此取富貴豈可一日輒忘。

中進士的便當席書寢研做財主的便當臥糞寢灰。

○ ○ 讀父書

顧愷讀父書每句應諾。見韻府

○ 敬妻

樊英常病臥便室中。英妻遣婢拜問。英答拜。或問之。英

曰妻齊也。

唐薛昌緒與妻會必有禮容先命女僕通語再三然後秉燭造室至於高談虛論茶果而退或欲就宿必請曰某以繼嗣事重輒欲卜其嘉會候報可方入禮亦如之。

○○妻犯齋禁

周太常澤字穉都清潔守禮嘗臥病齋宮妻闕問所苦周以爲干犯齋禁大怒收送詔獄時人爲之語曰生世不諧作太常妻一歲三百六十日三百五十九日齋一日不齋醉如泥。

○○百忌曆

李戴仁性迂緩娶閻氏年甚少與之異室私約曰有與則見一夕閻忽叩戶戴仁急取百忌曆看之大驚曰今夜河魁在房不可行事謝到而已閻慙去

又漢陳伯敬與妻交合必擇時日遣媵御將命往復數四

○拱手對妾

溫公未有子清河郡君爲置一妾一日乘間俾盛飾送入書房公畧不顧妾思所以嘗之取一帙問曰中丞此

是何書、公拱手莊色對曰、此是尚書、妾乃逡巡而退、

○○問安求嗣

國朝史餘云、陳獻章入內室、必請命於太夫人曰、獻章求嗣、顧主事餘慶面質之、因正色曰、是何言、太夫人孀婦也、陳嘿然、常熟周木嘗朝叩父寢室、父問誰、曰、周木問安、父不應、頃之、又往曰、周木問安、父怒起叱之曰、老人酣寢、何用問爲、時人取以爲對曰、周木問安、獻章求嗣。

○不近妓

王琨性謹慎。顏師伯豪貴。設女樂要琨。酒炙皆命妓傳行。每及琨席。必令致牀上。回面避之。俟其去。方敢飲啖。此等客。顏不必請。此等席。王不必赴。

蔡君謨守福唐時。會李太伯與陳烈於望海亭。以歌者侑酒。方舉板一拍。陳驚怖越席。攀木踰牆而去。

又是一箇陳驚座。

楊忠襄公邦乂。少處郡庠。足不涉茶房酒肆。同舍欲壞其守。拉之出飲。託言朋舊家。實娼館也。公初不疑。酒數行。娼艷妝而出。公愕然趨歸。取其衣焚之。流涕自責。

〇〇心中有妓

兩程夫子越一士夫宴有妓侑觴伊川拂衣起明道盡
歡而罷次日伊川過明道齋中愠猶未解明道曰昨日
座中有妓吾心中却無妓今日齋中無妓汝心中却有
妓伊川自謂不及

〇欲黥妓

江東有縣尹欲黥妓女之面以息誨淫之風咨訪邑中
長者曰曾伏觀祖訓有云子孫做皇帝不用黥刺刑
剗閉割之刑臣下敢有奏用此刑者犯人凌遲全家處

死。縣尹乃悚然流汗，事遂寢。

○○李退夫穢語

宋冲晦處士李退夫者，爲事矯異，居京師北郊。一日種胡荽，俗傳口誦穢語則茂。退夫撒種，密誦曰：夫婦之道，人倫之本。云云不絕於口。忽有客至，命其子畢之。子執餘種曰：大人已會上聞，故皇祐中，館閣或談語，則曰：宜撒胡荽一巡。

夫婦果是穢語，處士不錯，肖胤雅言，便令胡荽不茂。

○○雅言

李獻臣好爲雅言。知鄭州時。孫次公爲陝漕。罷越闕。先遣一使臣入京。所遣乃獻臣故吏。到鄭庭參。獻臣甚喜。欲令左右延飯。乃問之曰。餐來未。六。怪。使臣誤意餐者。謂次公也。遽對曰。離長安日。都運已治裝。獻臣曰。不問孫待制。官人餐來未。其人漸沮而言曰。不敢仰昧。爲三司軍將日。曾喫却十二。蓋鄙語謂遣杖爲餐。獻臣掩口曰。官人誤也。問曾與未曾餐飯。欲奉爵一食耳。

本欲雅言。自費唇舌。

汪司馬南溟喜摹古。一日其媳與夫競龍。割去夫勢。僅

惶惶趨報坐客驚問汪徐徐應曰兒婦下兒子腐刑
崑山周用齋不識道路每至轉灣必拱立道左向人曰
問津怪負擔者不解其義因指義井與之。

誦經稱小人

燕北風俗不問士庶皆自稱小人宣和間有遼國右金
吾衛上將軍韓正歸朝授檢校少保節度使對中人以
上說話卽稱小人中人以下卽稱我家每日到漏舍誦
天童經數十遍其聲朗然且云對天童豈可稱我自皇
天生我以下二十餘句凡稱我者皆改爲小人皇天生

小人皇地祇小人日月照小人北斗輔小人云云誦畢
贊歎云這天童極靈聖傍一人云若無靈聖如何持得
許多小人耶

雅與不雅總成迂腐

○○匍匐圖

福州陳烈動遵古禮蔡君謨居喪莆田烈往弔之將至
境語門人曰詩云凡民有喪匍匐救之今將與二三子
行此禮於是烏巾襴褕偕二十諸生望門以手据地膝
行號慟而入婦人望之皆走君謨匿笑受弔卽時李遺

畫匊匊圖。

○○滅竈

梁伯鸞少孤嘗獨止不與人同食比舍先炊已呼伯鸞及熱釜炊伯鸞曰童子鴻不因人熱者也滅竈更燃之事莫妙於善因伯鸞心術未免太冷

○懷糒

物理論云呂子義當世清賢士也有舊人往存省嫌其設酒食懷乾糒而往主人榮其降已乃盛爲饌義出懷中乾糒求一盃冷水而食之

○○飲食必以錢

風俗通云、安陵清者郝仲山、每飲馬渭水、投三錢於水。○水○也○不○響○
中、潁川郝子廉亦然、又郝嘗過姊家、飯密畱五十錢、席
下而去、後漢書范丹嘗看姊病、設食、丹出門、畱錢百文、
姊追送之、丹見里中芻蕘僮更相怒曰、言汝清高、豈范
史雲輩乎、丹歎曰、吾之微志、乃在僮豎之口、不可不勉、
遂棄錢而去。

○別駕拾桑

隋趙軌爲齊州別駕、東鄰有桑椹落其家、軌悉拾還之、

別駕亦有公事。那得此閒工夫。

後周張元性廉潔。南鄰有杏二樹。杏熟。多落元園中。悉拾以還主。子猶曰。這又是趙軌作俑。

○却衣

軒惟行名軌。鹿邑人。清介。四時一布袍。嘗督漕淮上。嚴冬。忽墮水。援出。裹被坐。有司急進衣。却去。竟俟衣乾。幸有被裹。不然。不學陳三。凍殺乎。

○埋羹

王璠爲寧波守。自奉儉約。一日見饌兼魚肉。大怒。命撒。

而瘞之。世號埋羹太守。

太好名。太作業。

○珠玉報

貴州廉使孔公。苦節自勵。上官以明珠寶玉來獻。公悉於堂上椎碎之。遂爲土官下火臺。行抵浙江。火自口出。高數丈而卒。

不受可也。椎碎何說。暴殄天物。死宜矣。

○○仇管省遇

郭林宗謂仇季知曰。子嘗有過否。季知曰。吾嘗飯牛。牛

不食、鞭牛一下、至今戚戚耳。

管寧泛海、舟覆、曰、吾嘗一朝科頭、三晨晏起、過必在此、

○顧協

北史顧協、少時、將聘舅息女、未成婚、而協母亡、免喪後、不復娶、年六十餘、此女猶未他適、協義而迎之、卒無嗣、此等嫁娶、是亦不可以已乎。

○吳徵士學問

吳徵士與弼、一日出獲、手爲餘傷、流血不止、舉視傷處、曰、若血不卽止、而吾收之、卽是爲爾所勝、言已而獲如。

故又往遊武夷。過逆旅，索宿錢至多三文，堅不與。或勸之曰：「卽此便暴殄天物，乃負擔夜去。」吳康齋召至京師，嘗以兩手大指食指作圖，曰：「令太極常在眼前。」長安浮薄少年，競以蘆蘆投其中，戲侮之，公亦不顧。

○○太極冤

婁諒自負道學，佩一象環，名太極圖。桑悅怪而作色曰：「吾今乃知太極圖而中虛作太極訴冤狀，一時傳誦。」

○心學二圖

天順初漳州布衣陳剩夫名真晟詣闕獻心學二圖其一爲天地聖人之圖大書一心字以上一點規而大之虛其中曰太極左曰靜作十六點黑右曰動作十六點白自是如旋螺狀凡十點彎而向左又各作十八點如前而大每一點包二卦以爲太極生生之義盡於此矣其一爲君子法天之圖亦大書一心字其上點規而大之虛其中曰敬左曰靜右曰動各作互圓相入左半黑而白白復黑右半白而黑黑復白卽太極之陰陽動靜也下禮部掌部事侍郎鄒幹不知說云何爲寢其事

○萬物一體

一儒者譚萬物一體。忽有腐儒進曰：設遇猛虎，此時何以一體？又一腐儒解之曰：有道之人，尚且降龍伏虎，卽遇猛虎，必能騎在虎背，決不爲虎所食。周海門笑而語之曰：騎在虎背，還是兩體，定是食下虎肚，方是一體。聞者大笑。

○茶具

范蜀公與溫公遊嵩山，以黑木合盛茶。溫公見之，驚曰：景仁乃有茶具耶！

謝在杭曰。一木合盛茶。何損清介。而至驚駭。宋人腐爛。乃爾。子猶曰。此箕子啼象箸之意也。

○裝胡桃

相國吳石湖一日宴客。以胡桃裝就。而後籠罩。公屢裝不就。一僮先以桃下罩。用碟盛起。公撫膺歎曰。民僞日滋矣。

迂腐部終